

*Animæ immortalitas rationi  
non adversatur.*

**E**Rgone tam proprii quisquam est oblitus honor  
 Degener ignavam subit, & sententia mentis  
 Vilius, ut mentes putet evanescere in auras,  
 Postquam corporea fuerint compage solutæ?  
 Quæ si vera (quod absit) quin Epicure triumphes,  
 Teque putes solum vitæ tenuisse beatæ  
 Rectum iter, & reliquos flexisse per avia gressus  
 Virtutes rigidas, ærumnosasque sequentes.  
 Nam vere vitalis erit Cyclopica vita  
 Corporeis immersa bonis, secura futuri.  
 Error erit pietas communis, terror inanis  
 Infernus, fucus virtus, & fabula cælum.  
 Hæc tantum fuerint hominum commenta vafrorum,  
 Credula in obsequium flectant ut pectora vulgi.  
 Quid? pietasne, & virtus per mendacia constant?  
 Infœlix virtus! at vos Cyclopi alumni,  
 Mortales (heu frustra) animas optabitis olim.  
 Nulla fidem facient nisi sensibus obvia crassis?  
 Nonne aciem fugiunt oculorum ventus & aer?  
 Cerneturque oculis animæ exilientis imago?  
 Spiritus est animus simplex divinitus haustus:  
 Non ex materiæ gremio producitur almæ,  
 Non in materiæ gremium resoluta redibit,  
 Cœlestisque ortus memor ad sublimia fertur,  
 Carceris atque sui sordes pertæsa, per omnes  
 Aeris & Cœli tractus, pelagiisque vagatur,  
 Immensumque brevi spatio circumvolat orbem;  
 Naturæque omnes penitus scrutatur abyssos.  
 Crescit amor veri quantum ipsa scientia crescit  
 Huccine num potis est terrena assurgere moles?  
 Corpore languenti, mentis mage vivida virtus  
 Sensibus abstracta &, dulci se nectare pascit,  
 Ipsaque cœlestis cœlestia pabula quarit  
 Nititur utque ignis supera ad convexa volare:  
 Ignea sic animi superas vis tendit ad auras.  
 Et sicut liquidis saliens è fontibus vnda  
 Per terræ venas varijs anfractibus errat,  
 Assurgat donec quantum descenderat ante:  
 Sic mens natales petit irrequieta supernos,  
 Æterni sitibunda boni, haud saturata caduco.  
 Mentibus hæc ergo frustra aut innata cupido  
 Corporis objicibus ruptis, aut, luce fruetur  
 Optata. Et quis erit qui spurco grunniat ore  
 Non superesse animam diuinæ particulam auræ?  
 Vnam at perpetuis noctem dormire tenebris?  
 Gothus, Arabs, populi que polo sub utroque iacentes,  
 Indus & Hibernus Phœbo sub utroque iacentes,  
 Immortalem animam concordie voce tuentur.  
 Inque malis medijs hac spe sua damna leuant  
 Illustres animæ, mortem per dura petentes.  
 ERGO  
 Exuta infirmos moribundi corporis artus  
 Vivit, & æternum vivet mens nescia fati.